

陳銘申先生墓誌銘

同事陳君保華因修家乘持其先大父之行狀請銘不敢以不敏辭按狀先生諱文酉字銘申湘陰人曾祖在位祖有道考其祥世有潛德昆季七行三幼岐嶷長倜儻賦性和平友于一堂怡怡如也遇事恆相推讓故能致家太和不忝義門遺風矣析箸後課子孫恪勤師儉肫摯敦勉罔疾言遽色自甘淡泊而待人接物靡不周至手創二都思祖屋移遶七房共有備建支祠知報本也生平勇於爲義地方善舉力所能及樂成其美見宗族鄉黨間貧苦孤寡踵門告急者加意供給無吝色晚任鄉政

爲人排解傾囊息事昔文範長太丘平心率物其有爭訟輒求
判正衆歎曰甯爲刑法所加不爲陳君所短其令人歎服鄉里
稱爲長者先生有焉乃孫保華英妙練達不辜詒謀興宗繩武
光大門閭方興未艾也先生生清咸豐六年丙辰十月十三日
歿民國十八年己巳八月十二日壽七十有三葬湘陰四都源
塘鄉畫石團剪塘灣屋右元配王無出繼配任生文夫子一女
一適舒故孫曾各一人今礪石墓道納銘幽隧銘曰

有媯後無懷風謙謙君子求於古人之中博施於鄉里異口
同聲以長者稱

公宜其子孫賢肖善紹述而續戎

署衡陽地方法院推事世愚姪平江吳楚謹撰